



Adresa: **Ul. H. Čemerlića 39a**
71000 Sarajevo
<http://www.voda.ba>

tel. +387 33 726-444; 726-400
fax. +387 33 726-423
e – mail: info@voda.ba

Broj: UP-1/21-3-40-282-5/22
Datum: 26.07.2022. godine

«Agencija za vodno područje rijeke Save» Sarajevo rješavajući po zahtjevu pravnog lica „EMINAL“ d.o.o Živinice, za donošenje rješenja o vodnoj dozvoli za ispuštanje tehnoloških otpadnih voda iz pogona za plastifikaciju aluminijskih profila i limova sa pratećim sadržajima izgrađene u naselju Suha, općina Živinice, na osnovu člana 139. stav (1) tačka 3. Zakona o vodama («Službene novine Federacije BiH», broj 70/06) i člana 200. stav (1) Zakona o upravnom postupku («Službene novine Federacije BiH», broj 2/98 i 49/99), donosi

RJEŠENJE **o vodnoj dozvoli**

1. Pravnom licu „EMINAL“ d.o.o Živinice daje se vodna dozvola za ispuštanje tehnoloških otpadnih voda iz pogona za plastifikaciju aluminijskih profila i limova sa pratećim sadržajima izgrađene u naselju Suha, općina Živinice, na zemljištu označenom kao k.č. broj: 1479/1 K.O. Suha, općina Živinice.
2. Ova vodna dozvola ne oslobađa podnosioca zahtjeva obaveze pribavljanja saglasnosti i dozvola od strane drugih nadležnih organa, a sve u skladu sa važećim zakonskim propisima, uredbama i dr.
3. Vodna dozvola se daje na osnovu činjeničnog stanja utvrđenog pregledom dostavljene projektne i druge dokumentacije, izvršenog uviđaja na lokaciji objekta i pod slijedećim uslovima:
 - 3.1. Da se upotreba i korištenje predmetnog objekta vrši u skladu sa urađenom investiciono tehničkom dokumentacijom, koja je služila kao podloga za davanje ove vodne dozvole.
 - 3.2. U toku važenja ovog Rješenja, korisnik predmetnih objekata je obavezan poduzeti sve potrebne mjere kako bi kvalitet tehnoloških otpadnih voda, a prije ispuštanja u recipijent, zadovoljio granične vrijednosti emisije definisane prilogom 28. Uredbe o uslovima ispuštanja otpadnih voda u okoliš i sisteme javne kanalizacije («Službene novine Federacije BiH», broj 26/20 i 96/20).
 - 3.3. Korisnik objekta je dužan, putem laboratorije ovlaštene od strane Federalnog ministarstva poljoprivrede, vodoprivrede i šumarstva, vršiti redovna ispitivanja kvaliteta otpadnih voda, uzimanjem uzorka efluenta iz okna za monitoring u skladu sa članom 19. stav (4) Uredbe o uslovima ispuštanja otpadnih voda u okoliš i sisteme javne. Učestalost i način ispitivanja vršiti u skladu sa članom 20. Uredbe o uslovima ispuštanja otpadnih voda u okoliš i sisteme javne kanalizacije. Rezultate analiza dostaviti ovoj Agenciji. Izvještaje o ispitivanju i ocjeni kvaliteta otpadnih voda može uraditi isključivo laboratorija ovlaštena od strane Federalnog ministarstva poljoprivrede, vodoprivrede i šumarstva po osnovu člana 64. stav (3) Zakona o vodama i Pravilnika o uslovima koje moraju ispunjavati referentne odnosno ovlaštene laboratorije za ispitivanje voda, sadržaj i način davanja ovlasti («Službene novine Federacije BiH», broj 14/10, 14/3, 26/14, 15/17, 23/17 i 41/20).
 - 3.4. Ukoliko Vlada Tuzlanskog kantona propiše dodatne (strožije) uvjete od uvjeta definisanih u Prilogu 28. Uredbe o uslovima ispuštanja otpadnih voda u okoliš i sisteme javne kanalizacije, podnosilac zahtjeva je u obavezi iste ispoštovati.

- 3.5. Da se nastali otpad na predmetnoj lokaciji prikuplja i privremeno odlaže u skladu sa važećim propisima o postupanju sa otpadom, a za zbrinjavanje istog potpiše ugovor sa ovlaštenom firmom za tu vrstu djelatnosti.
- 3.6. Da se odvoz i konačno zbrinjavanje sadržaja (mulja) iz uređaja za prečišćavanje otpadnih voda i ostalog opasnog otpada sa predmetne lokacije može vrši isključivo od strane firme ovlaštene za tu vrstu djelatnosti, prema sklopljenom ugovoru. O načinu i vremenu radova održavanja, odnosno o pražnjenju, odvozu i zbrinjavanju sadržaja separatora ulja i masti, neophodno je voditi službenu evidenciju i arhivu.
- 3.7. Da se u skladu sa propisima iz oblasti zaštite okoliša vrši bezbjedno skladištenje i postupanje sa opasnim materijama i otpadom nastalim na predmetnom lokalitetu (adekvatnim mjerama onemogućiti bilo kakvo isticanje i rasipanje opasnih i štetnih materija na tlo i u vode).
- 3.8. Sadržaj (mulj) iz uređaja za prečišćavanje otpadnih voda i opasni otpad ne smije se odlagati na česticu «vodno dobro», odnosno u vodotoke i na njegove obale.
- 3.9. Investitor je obavezan pridržavati se svih mjera i uslova, propisanih u saglasnostima i dozvolama, izdatim od strane drugih nadležnih organa, a odnose se na korištenje i zaštitu voda i nisu u suprotnosti sa uslovima iz ove vodne dozvole.
4. Vlasnik, odnosno korisnik objekta je obavezan voditi propisne evidencije, te nadležnim organima dostavljati propisane obrasce (Obrazac EBS) u skladu sa Zakonom o vodama („Službene novine Federacije BiH“, broj 70/06) i Pravilnikom o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte vodne naknade i posebnih vodnih naknada („Službene novine Federacije BiH“, broj 92/07 - 03/16), Prilog 1., Poglavlje V, – Određivanje koeficijenata zagađenja za zagađivače voda kod kojih se ne vrše direktna mjerenja voda te prema dostavljenim obrascima izvršavati u cjelosti i u propisanim rokovima obavezu plaćanja vodnih naknada.
5. U periodu važenja ove vodne dozvole, Investitor, odnosno korisnik predmetnog objekta je dužan provoditi sve mjere i aktivnosti propisane istom.
6. U slučaju izvanrednih situacija, havarijskih onečišćenja i drugih sličnih okolnosti, čime bi bio ugrožen kvalitet podzemnih i površinskih voda, korisnik objekta obavezan je izvijestiti nadležne organe i izvršiti izvanredna postupanja po nalogu nadležnih organa, te o vlastitom trošku uzroke štete otkloniti, a nastale štete nadoknaditi.
7. Ukoliko usljed štetnog djelovanja voda nastalog zbog neizgrađenosti ili nedovoljne osposobljenosti (zaštitnih) vodnih objekata dođe do nastanka štete na objektima predmetnog poslovno-proizvodnog pogona za plastifikaciju aluminijskih profila i limova obuhvaćenim ovom vodnom dozvolom, korisnik zaštitnih vodnih objekata nije odgovoran za nastale štete..
8. Prava stečena po ovoj vodnoj dozvoli ne mogu se prenositi na treća lica, a ista prestaju u skladu sa odredbama Zakona o vodama.
9. Ova vodna dozvola, shodno članu 117. stav (1) i 129. Zakona o vodama se daje sa rokom važenja od 5 (pet) godina, od dana pravosnažnosti ovog rješenja.
10. Prije isteka važnosti ove vodne dozvole, Investitor, odnosno korisnik objekta je dužan da podnese zahtjev za izdavanje nove vodne dozvole.
11. Ovo rješenje o vodnoj dozvoli može se izmijeniti ukoliko za to nastupe razlozi utvrđeni u članu 130. stav (1) tačka 1., 2., 3. i 4. Zakona o vodama, a zainteresirane stranke podnesu argumentiran zahtjev za izmjenu ovog vodnog akta.

Obrazloženje

Pravno lice „EMINAL“ d.o.o Živinice se pismenim putem obratio ovoj Agenciji za ispuštanje tehnoloških otpadnih voda iz pogona za plastifikaciju aluminijskih profila i limova sa pratećim sadržajima izgrađene u naselju Suha, općina Živinice.

U provedenom postupku dostavljena je i pregledana slijedeća dokumentacija:

- Rješenje o izmjenama podataka broj: 032-0-Reg-17-000299 od 06.03.2017. godine, izdatog od strane Općinskog suda u Tuzli;
- Ovjerena kopija Uvjerenja o poreskoj registraciji, od 25.04.2006.godine, izdatog od strane Porezna uprava-Kantonalni ured Tuzla;
- Rješenje o okolinskoj dozvoli broj: UPI 05/2-23-11-60/19 od 22.08.2019 godine izdato od strane Federalnog ministarstva okoliša i turizma;
- Rješenje o odobrenju za građenje za poslovni objekat-hala za skladištenje, broj: 05/11-23-3400/16 od 19.10.2016. godine izdatog od strane Službe za prostorno planiranje i komunalne poslove, općina Živinice;
- Rješenje o odobrenju za građenje za poslovni objekat-proizvodna hala, broj: 05/4-361-177/98 od 28.12.1998. godine izdatog od strane Uprave za imovinsko-pravne, geodetske i urbanističke poslove, općina Živinice;
- Izvještaj o monitoringu kvaliteta i kvantiteta otpadnih voda pogona za plastifikaciju aluminijskih profila i limova „EMINAL“ Živinice, urađen od strane „Inspekt-RGH“ d.o.o. Sarajevo, mart 2022. godine;
- Kopija Rješenja o vodnoj dozvoli donesenog od strane Agencije za vodno područje rijeke Save broj: UP-I/25-3-40-228-6/17 dana 12.06.2017. godine;
- Glavni projekat za korištenje i ispuštanje otpadnih voda na lokalitetu dograđenog poslovnog objekta-hale za skladištenje u firmi „EMINAL“ d.o.o. Živinice, urađen od strane „DIWANX“ d.o.o. Živinice, juli 2016 godine;
- Dokaz o uplaćenju upravnoj taksi na zahtjev.

Nakon pregleda dostavljene dokumentacije, u skladu sa članom 12. stav (5) i (6) Pravilnika o sadržaju, obliku, uvjetima, načinu izdavanja i čuvanja vodnih akata („Službene novine Federacije BiH“ broj 31/15, 55/19 i 41/20), izvršen je pregled predmetne lokacije i tom prilikom sačinjen zapisnik o uviđaju broj: UP-1/21-3-40-282-3/22 dana 06.07.2022. godine

Na osnovu dostavljene dokumentacije i izvršenog uviđaju na predmetnoj lokaciji utvrđeno je slijedeće:

Na predmetnoj lokaciji nalaze se sljedeći sadržaji: proizvodna hala, skladišno administrativni objekat i prostor u kome smješteno postrojenje za tretman tehnoloških otpadnih voda.

Snabdijevanje predmetnog poslovno-proizvodnog objekta se vrši priključkom na mjesni vodovodni sistem „Dobra voda“, Suha.

U predmetnom proizvodnom pogonu se vrši tehnološki postupak elektrostatskog bojenja poliesterskim i epoksidnim prahom (plastifikacija) aluminijskih profila i limova. Postupak plastifikacije profila i limova započinje hemijskom pripremom tj. potapanjem profila u odgovarajuće kade. Nakon hemijske pripreme aluminijski profili idu u sušaru na zagrijavanje do određene temperature (100°C), a potom u kabinu za elektrostatsko lakiranje. Nakon lakiranja profili transporterima idu u peć za polimerizaciju.

Tehnološke otpadne vode nastaju u postupku hemijske obrade Al profila i limova u procesu odmašćivanja, pasivizacije i ispiranja. Ove otpadne vode se odgovarajućim cjevovodima odvođe u izgrađeno postrojenje za prečišćavanje tehnoloških otpadnih voda. Postrojenje se sastoji od pet bazena za prihvatanje otpadne vode po vrstama, reakcionih posuda gdje se vrši postupak tehnološke obrade

(redukcija, neutralizacija flokulacija), dekantera-ugušćivača gdje se vrši odvajanje mulja iz otpadne vode, filter prese u kojoj se vrši cijedenje mulja i završnog filtriranja na filteru sa aktivnim ugljem. Prečišćena voda se velikim dijelom vraća u proces proizvodnje i koristi se u procesu ispiranja dok višak vode se ispušta u rijeku Sušicu.

Otpad koji nastaje u kabinama za nanošenje epoksidnog praha-višak praha se putem ciklona usisava u silos i zbrinjava od ovlaštene firme.

Otpadne vode od pranja podova i eventualno prosutih agresivnih toksičnih tečnosti se odvođe kanalima do bazena za otpadne vode i tretiraju zajedno sa ostalim tehnološkim vodama.

Na osnovu dostavljene dokumentacije i uviđaja izvršenog na predmetnoj lokaciji, a u svrhu smanjenja negativnih uticaja predmetnog objekta na stanje voda i vodni režim, podnosiocu zahtjeva su ovom vodnom dozvolom u tački 3. dispozitiva Rješenja propisani uslovi u skladu sa odredbama članova 53. i 116. Zakona o vodama, člana 12. i 13. Pravilnika o sadržaju, obliku, uvjetima načinu izdavanja i čuvanja vodnih akata i odredbama člana 3. tačka s) i članova 14., 19. i 20 Uredbe o uslovima ispuštanja otpadnih voda u okoliš i sisteme javne kanalizacije.

Tačkom 4. dispozitiva rješenja je propisana u skladu sa tačkama 12. i 35. Pravilnika o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte i posebnih vodnih naknada („Službene novine Federacije BiH“, broj 92/07, 46/09, 79/11 i 88/12) i Odlukom o visini posebnih vodnih naknada („Službene novine Federacije BiH“, broj 46/07).

Na osnovu provedenog postupka konstatuje se da je podnosilac zahtjeva „EMINAL“ d.o.o. Živinice ispunio minimum uslova za izdavanje vodne dozvole za ispuštanje tehnoloških otpadnih voda iz pogona za plastifikaciju aluminijskih profila i limova sa pratećim sadržajima izgrađene u naselju Suha, općina Živinice., te je riješeno kao u dispozitivu ovog Rješenja.

Uputa o pravnom lijeku:

Protiv ovog rješenja može se uložiti žalba Federalnom ministarstvu poljoprivrede, vodoprivrede i šumarstva, u roku od 15 dana od dana prijema rješenja.

Žalba se podnosi neposredno pismeno ili preporučeno putem pošte ovom organu i taksira se sa 15 KM takse, prema tarifnom broju 3. Tarife federalnih administrativnih taksi.


Voditelj postupka:

Meho Čaušević, B.Sc.ing.građ.

Prilog:

- Glavni projekat za korištenje i ispuštanje otpadnih voda na lokalitetu dograđenog poslovnog objekta –hale za skladištenje u firmi „EMINAL“ d.o.o. Živinice, urađen od strane „DIWANX“ d.o.o. Živinice, juli 2016 godine.

Po ovlaštenju
Rukovodilac sektora za izdavanje vodnih akata


Haris Ališehović, dipl.ing.građ.

Dostaviti:

- „EMINAL d.o.o. Živinice, ul. Suha bb, Živinice 75270 (sa prilogom)
- AVP Sava, ISV – Vodna knjiga
- Sektor 50
- Sektor 40, arhiva
- Oglasna ploča AVP Sava